



31. maj 2011

Inatsisartut suleriaasianni § 37 naapertorlugu Naalakkersuisunut apequtit imaattut matumuuna saqqummiuppara:

Naalakkersuisunut apequt:

1. **Uummannami atuartut angerlarsimaffiata illutaa aserfallassimalluni ajorluinnartuq pillugu suut imaluunniit suna pissutigalugu Naalakkersuisut manna tikillugu iliuseqarsimangillat?**
2. **Uummannami atuartut angerlarsimaffiata illutaani aserfallassimaqisumi aaqqiiviginiarlugit Naalakkersuisut qanoq iliuseqarniarpat?**

(Inatsiartuni ilaasortaq, Karl Lyberth Siumut)

Tungavilersuut:

Kultureqarnermut Naalakkersuisoq Mimi Karlsen ukioq manna januarimi Uummannamiinnermini atuartut angerlarsimaffiat pineqartuq pulaarsimavaa.

Kultureqarnermut Naalakkersuisup nammineerluni pissutsit qanoq ajortigineri takusimassavai, taassumalu saniatigut oqaluttuarfigineqarpoq pissutsit ilumut qanoq ajorluinnartiginerini.

Angerlarsimaffimmi pineqartumi pissutsit ajorluinnartut pillugit Sermitsiaq nr. 21-mi 27. maj 2011 saqqummersumi allaaserisaq takuneqarsinnaavoq.

Paaserusunnarpoq suna pissutigalugu qaammatini tallimani pissutsit pineqartut ajorluinnartut pillugit Naalakkersuisut aaqqiinialutik iliuseqarsimanginnerut. Tupinnarpormi meeqqat inuusuttuaqqallu angerlarsimaffianni pissutsit ajungaaramik akuerineqarsinnaangilluinnartut pillugit Naalakkersuisut ilisimannikkaluarlutik iliuseqarsimanginnerat.

Meeqqat inuusuttuaqqallu angerlarsimaffianni pineqartumi pissutsit pinngitsuunngilluinnarluni aaqqiivigineqartariaqarmata paaserusunnarpoq Naalakkersuisut aaqqiissutissanik sunik pilersaaruteqarnersut.

Uanga nammineerlunga isumaqarpunga piaarnerpaamik Uummannami atuartut angerlarsimaffiannik nutaamik sanasoqartariaqartoq, paasitinneqarnera malillugu iluarsaassiinnarneq naammannaviangimmat.